

Rapport dalla seduta dil cussegl da vischnaunca dils 12 da settember 2024 en l'aula dalla casa da scola Breil

Presenza:	10 commembers dil cussegl
	3 suppleants cun dretg da votar
	1 suppleant senza dretg da votar
	1 commember dalla cumissiun da quen e gestiun
	4 commembers dalla suprastanza communal + actuar
Hosps:	Marcel Friberg, tractanda 3
	5 ulteriurs hosps

Il president dil cussegl, Gérard Carigiet fa in cordial beinvegni a tut ils presents alla seduta da questa sera. In spezial beinvegni fa el a Marcel Friberg che vegn a presentar il project sut tractanda 3. Vinavon beneventa el Celine Meury, sviluppadra dalla Regiun Surselva, il representant da RTR Franco Caviezel ed ils ulteriurs hosps.

La gliesta da tractandas, la quala ei vegnida tarmessa tier cun l'invitaziun, vegn suttamessa alla discussiun. Cunquei ch'ei vegn buca fatg diever da tala ei la gliesta per la seduta da questa sera ligionta.

1. Approbaziun dil protocol dalla seduta dil cussegl dils 21 da matg 2024

Il protocol ei vegnius tarmess allas cusseglieras ed a tuts cussegliers. Il president dil cussegl sutametta quel alla discussiun. Da tala vegn buca fatg diever. Il protocol vegn approbaus unanim (13:0).

2. Approbaziun: credit sanaziun via Val Capeder Dardin

Il president dil cussegl tschenta la damonda d'entrar ed arva la discussiun. Da tala vegn buca fatg diever. Aschia ei l'entrada decidida e la fatschenta sa vegnir tractada.

En la davosa seduta dil cussegl ha il president communal informau che la via en la Val Capeder a Dardin seigi stuschada per varga 3 meter encunter val en connex cun las plievlias intensivias dalla primavera. Ussa ha igl inschignier Iso Mazzetta tschentau ensemen il project per la sanaziun ed il cantun ha concediu la lubientscha da baghegiar. Tenor calculaziun digl inschignier muntan ils cuosts per quella sanaziun a frs. 333'000.00. La sanaziun vegn fatga en duas etappas e l'emprema entscheiva en igl october 2024. La primavera 2025 vegn cuntinuau cun las ulteriuras lavurs.

La suprastanza fa la proposta al cussegl da conceder in credit da frs. 350'000.00 per la sanaziun dalla via.

Clau Schlosser presenta la fatschenta e dat aunc ils sclariments necessaris. Sin las damondas sa vegnir dau risposta per cuntentientscha dils presents.

La discussiun vegn dada libra. Cunquei ch'ei vegn buca fatg diever dalla discussiun vegn votau giu. Il cussegl approbescha unanim (13:0) il credit per la sanaziun dalla via Val Capeder a Dardin

Convischinas e convischins che ein buca cuntents cun l'approbaziun da quei credit sco tal, san far diever dil referendum facultativ tenor constituiun communal.

3. Presentaziun project Ordavon

Co sa la destinaziun turistica Breil/Vuorz/Andiast sesviluppar els proxims onns. Quella damonda ha fatschentau la suprastonza il davos atun. Per ellavurar ora in project ha la suprastonza surdau l'incumbensa a Marcel Friberg. Per quella lavur ha la suprastonza aunc elegiu ina cumissiun che secumpona ord persunas dallas differentas spartas da lavur e ord ils vischinadis. En pliras sedutas ha quella cumissiun ellavurau ora il project « Ordavon ». Marcel Friberg presenta la lavur finala al cussegl e dat ils sclariments necessaris. Quella presentaziun vegn publicada sin nossa pagina aschia che la populaziun sa era prender investa.

Il president dil cussegl engrazia a Marcel Friberg per la presentaziun dil project ed informescha ch'ei detti ils 9 d'october 2024 ina presentaziun publica per la populaziun en l'aula a Breil.

Il president communal sa informar il cussegl, che enqual project numnau seigi schon sin via per exempel la sanaziun dalla via atras Danis. L'investa publica da quella sanaziun ha liug naven dils 19 da settember 2024 e las lavurs duessan entscheiver la primavera 2025.

Tgei che vegn giavischau dils presents ei, ch'ei fussi bien che aschia ina gruppa existi vinavon per ellavurar vinavon quei project. La suprastonza ha priu enconuschientscha da quei giavisch e vegn a far sias ponderaziuns quei denton per suenter l'informaziun publica.

4. V a r i a

Clau Schlosser informescha il cussegl sur dalla decisiun dalla Dretgira Administrativa en connex cun la via da colligaziun. Deplorablamein han ils recurents privats tratg vinavon la decisiun a Lausanne. Las organisaziuns d'ambient vegnan buca a trer vinavon il cass a Lausanne. Quella decisiun dils privats ei da deplorar, cunquei ch'il svilup en nossa vischnaunca vegn aschia bloccaus fermamein.

Gérard Carigiet engrazia per la preschientscha e la partizipaziun. El giavischa allas cusseglieras ed als cussegliers in bien retuorn a casa e siara la seduta allas 22:00 uras.

Breil, ils 13 da settember 2024

Il president

Igl actuar